

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09) i člana 25. u vezi sa članom 124. Statuta Grada Tuzle („Službeni glasnik Grada Tuzle“, broj 6/21), Gradsko vijeće Grada Tuzle, na sjednici od 25. 2. 2025. godine, donosi

ODLUKU
o kriterijima i postupku za ostvarivanje prava na refundiranje dijela troškova gradskog i prigradskog prevoza iz Budžeta Grada Tuzle

I - OSNOVNE ODREDBE

Član 1.

(Opšte odredbe)

- (1) Ovom Odlukom utvrđuju se korisnici, kriteriji, iznos sredstava za dodjelu te postupak za ostvarivanje prava na refundiranje dijela troškova gradskog i prigradskog linijskog prevoza na području grada Tuzle.
- (2) Sredstva za refundiranje troškova prevoza planirana su u Budžetu Grada Tuzle na poziciji „Tekući transfer pojedincima za refundiranje dijela troškova gradskog i prigradskog prevoza“, u okviru Službe za kulturu, sport, mlade i socijalnu zaštitu (u daljem tekstu: nadležna Služba).
- (3) Riječi i pojmovi koji imaju rodno značenje, bez obzira jesu li u odredbama ove Odluke korišteni u muškom ili ženskom rodu, odnose se na jednak način na muški i ženski rod.

Član 2.

(Korisnici prava)

Pravo na dodjelu sredstava iz prethodnog člana mogu ostvariti sve osobe u stanju socijalne potrebe, penzioneri te pripadnici boračke populacije koji zadovoljavaju sljedeće opšte kriterije:

- a) imaju stalno prebivalište na području grada Tuzle (najmanje šest mjeseci prije dana podnošenja prijave),
- b) čiji ukupan prihod po članu porodičnog domaćinstva mjesečno ne prelazi 45% prosječne neto plate ostvarene u Federaciji Bosne i Hercegovine za prethodnu godinu, prema posljednjem zvaničnom objavljenom podatku.

Član 3.

(Iznos sredstava za dodjelu)

Osobama koje ispunjavaju kriterije iz prethodnog člana mogu se dodijeliti sredstva za refundiranje dijela troškova prevoza u iznosu od 50% vijednosti mjesečne karte gradskog i prigradskog prevoza za svaki mjesec u toku kalendarske godine.

II – DODJELA SREDSTAVA

Član 4.

(Postupak dodjele)

- (1) Sredstva iz člana 1. ove Odluke dodjeljuju se na osnovu javnog poziva koji objavljuje nadležna Služba za svaku kalendarsku godinu, a koji sadrži:
 - a) predmet i cilj javnog poziva,
 - b) iznos sredstava za dodjelu,
 - c) kriterije za prijavu na javni poziv,
 - d) trajanje javnog poziva i krajnji rok za dostavljanje prijave,
 - e) način preuzimanja prijavne dokumentacije,
 - f) način objavljivanja rezultata provedenog javnog poziva,
 - g) obrasce za prijavu na javni poziv.
- (2) Javni poziv se objavljuje dva puta u toku kalendarske godine na službenoj internet stranici Grada Tuzle (grad.tuzla.ba) i ostaje otvoren 21 dan od dana objavljivanja.

Član 5.

(Prijava na javni poziv)

- (1) Prijava na javni poziv podnosi se na prijavnom obrascu propisanom od strane nadležne Službe, a

- koji se objavljuje u prilogu javnog poziva. Jedan aplikant može podnijeti prijavu za sve članove zajedničkog porodičnog domaćinstva koji koriste mjesečnu kartu za gradski i prigradski prevoz na području grada Tuzle.
- (2) Uz popunjen prijavni obrazac aplikanti su obavezni dostaviti sljedeće dokaze o ispunjavanju uslova za ostvarivanje prava:
1. Izjavu o članovima zajedničkog porodičnog domaćinstva (kućna lista) ovjerenu kod nadležnog organa (original ili ovjerena fotokopija)
 2. Dokaz o radno-pravnom statusu za podnosioca zahtjeva i sve punoljetne članove zajedničkog porodičnog domaćinstva:
 - a) za nezaposlena lica – uvjerenje izdato od strane JU Služba za zapošljavanje Tuzlanskog kantona ili uvjerenje o redovnom školovanju ili dokument izdat od strane Porezne uprave FBiH – Poreska ispostava Tuzla iz kojeg je moguće utvrditi činjenicu da lice ne ostvaruje primanja po osnovu radnog odnosa (original ili ovjerena fotokopija),
 - b) za zaposlena lica – dokaz o visini plaće/platna lista (original ili ovjerena fotokopija),
 - c) za penzionere - ček od penzije (fotokopija) i
 - d) za lica koja su navršila 65 godina, a nisu ostvarila pravo na penziju - dokument izdat od strane Porezne uprave FBiH/Poreska ispostava Tuzla iz kojeg je moguće utvrditi činjenicu da lice ne ostvaruje primanja po osnovu prava na penziju (original ili ovjerena fotokopija).
 - e) za pripadnike boračke populacije - Uvjerenje o pripadnosti boračkoj populaciji (original ili ovjerena fotokopija),
 3. Izvod iz matične knjige rođenih za maloljetne osobe (fotokopija),
 4. Mjesečnu autobusnu kartu izdatu na ime podnosioca zahtjeva (fotokopija) i fiskalni račun/e za kupljenu mjesečnu autobusnu kartu/e (original ili fotokopija) ili drugi validan dokaz,
 5. Ugovor sa bankom o otvaranju ili potvrda banke o otvorenom tekućem računu podnosioca prijave (fotokopija).
- (3) Služba nadležna za provođenje procedure po javnom pozivu će po službenoj dužnosti izvršiti provjeru evidencije prebivališta za podnosioca prijave i članove zajedničkog porodičnog domaćinstva koji koriste mjesečnu kartu za gradski i prigradski prevoz kao i provjeru svih naknada po osnovu boračko-invalidske zaštite kod nadležne Sužbe za boračko invalidsku zaštitu, stambene poslove i povratak.
- (4) Dokumentacija navedena u stavu (2) ovog člana, pod rednim brojem 1. i 2. ne može biti starija od tri (3) mjeseca od dana podnošenja zahtjeva a dokumentacija pod rednim brojem 4. ne može biti starija od 30 dana od dana podnošenja zahtjeva.
- (5) Prijave na javni poziv aplikanti dostavljaju u zatvorenoj koverti preporučenom poštom ili predaju lično u Centru za pružanje usluga građanima (šalter sala) u zgradi Gradske uprave Tuzla.
- (6) Nepotpuna dokumentacija i dokumentacija dostavljena izvan predviđenog roka, neće se uzeti u razmatranje.

Član 6.

(Komisija za odabir)

Postupak po javnom pozivu provodi tročlana Komisija za odabir aplikacija koju rješenjem imenuje Gradonačelnik. Članovi Komisije se imenuju iz reda uposlenika Gradske uprave Tuzla.

Član 7.

(Provođenje postupka)

- (1) Komisija za odabir će provjeriti da li su zaprimljene prijave blagovremene i potpune te za one koje jesu izvršiti uvid u dostavljenu dokumentaciju kako bi utvrdila ispunjava li aplikant uslove definisane odredbama člana 2. ove Odluke.
- (2) Nakon izvršenog uvida u prijave Komisija će sačiniti zapisnik o radu i listu o odabiru korisnika koja treba sadržavati aplikante koji su ispunili uslove javnog poziva sa predloženim iznosom finansijskih sredstava za dodjelu (u iznosu od 50% vrijednosti mjesečne karte za gradskog i prigradski prevoz za svaki mjesec u toku kalendarske godine) kao i aplikante koji nisu ispunili uslove javnog poziva sa naznakom koji uslov nije ispunjen.
- (3) Po okončanju postupka odabira, zapisnik o radu i listu o odabiru korisnika Komisija dostavlja Pomoćniku gradonačelnika za nadležnu Službu koji donosi Program raspodjele sredstava, a Lista o odabiru korisnika se objavljuje na službenoj internet stranici Grada Tuzle (grad.tuzla.ba).

Član 8.
(Dodjela sredstava)

- (1) Nakon donošenja Programa raspodjele nadležna Služba će Službi za budžet i finansije svakog mjeseca, u toku kalendarske godine, dostavljati spisak korisnika za uplatu sredstava. Isplata mjesečnih iznosa sredstava vršit će se nakon dostavljenog dokaza o kupovini mjesečne karte od strane korisnika.
- (2) Spisak korisnika za uplatu sredstava ažurirat će nadležna Služba, a na osnovu dostavljenih dokaza o kupovini mjesečne karte koje su korisnici sredstava obavezni dostaviti uz propisani obrazac, najkasnije do 10.-og u tekućem mjesecu putem Centra za pružanje usluga građanima u zgradi Gradske uprave Tuzla.

III - PRELAZNE I ZAVRŠNE ODREDBE


Član 9.
(Prestanak važenja odredbi)

Stupanjem na snagu ove Odluke prestaju važiti odredbe člana 6., stav (1), tačka 9., člana 7.,stav (1), tačka 5. i člana 10., stav (1), tačka 8. Pravilnika o kriterijima i postupku za ostvarivanje prava na socijalne jednokratne novčane pomoći iz Budžeta Grada Tuzle („Službeni glasnik Grada Tuzle“, broj: 15/22, 1/24, 6/24 i 8/24).

Član 10.
(Stupanje na snagu)

Ova Odluka stupa na snagu 1. marta 2025. godine, i biće objavljena u “Službenom glasniku Grada Tuzle” a primjenjivat će se za refundiranje dijela troškova gradskog i prigradskog prevoza nastalih od 1. februara 2025. godine.

GRAD TUZLA
Gradsko vijeće
Broj: 01/31-A-3260-2025
Tuzla, 25. februara 2025. godine



PREDSJEDAVAJUĆA
Ana Pejić, BA prava